



伐檀齋集卷之三

吳趨張元凱左虞著

七言古詩

金昌篇

青山浮震澤紫靄凝滄溟既庶古吳邑有
美金昌亭金昌亭子碧城趾俯臨大道平
如砥象緯臺窺萬雉雄閭闔門開千片綺
垂楊繡陌春載陽芳草朱橋蒲路香甲第
連雲吳翡翠人臨水撲鴛鴦玉樓天上

近金屋民間葢種彼桃李葩映此鸚鵡飾
茂苑鬱葱藉胥江艷花月麗藻飛彩毫芳
塵襲羅幘清歌鳴鳳舞驚鴻寶樹瓊軒樂
未窮芙蓉散亂粧臺錦蘭麝氤氳步帳風
桂醕浮波玉爲饌高堂屋壁金珠緣雖非
戚里與皇家萬戶千門爛若霞玉帛南隣
耀皎日簪纓北里生光華清時富貴偏多
暇少歲歡娛晝爲夜宅中歌笑盡金張座
上風流總王謝澤國無煩擁回輪吳儂飛

檝浪如銀湖舸載將西子去渚花開作館
娃春蟬鬢宮雲薄蛾眉山月新爲雨乍逢
情易合傾城再見價難論由來金谷明珠
賤却笑臨邛綠綺貧迷花醉月靡年載相
逢賸有朱顏在長風可破月可拾直欲揚
舲泛滄海滄海回波不復來拂衣高眺吳
王臺吳王宮闕莽難辨棘荆麕鹿令人猜
棹歌猶唱烏棲曲百花洲上蘼蕪綠一川
春雨鷓鴣鳴鴈鳴聲裡年華更身世隙駒

影富貴草頭露萬物不可齊士也何須遇
園有桃歌且謠半生落魄無推擇大塊與
爾同道遙長鏡朝過買臣里短衣暮上伯
通橋舉棹徒自恭廡下竟寂寥不挂會稽
章空老吳門樵

匣劍行

生長夫差國家任專諸里鍛鍊昆吾成一
匣明秋水秋水泠泠聲透扉凄清中夜蛟
龍歸空廬獨抱明月卧高天颯動霜華飛

提攜神物無人覺何來白虹常在握鋒芒
衛霍耀天山精靈荆聶傾河嶽結客紛紛
向五陵呼盧博采且浮沉寧輸百萬留三
尺懸在腰間爾寸心鵲鴉新淬光如彗照
見人間不平事玉玦金鐸日日間匣中一
劍明珠淚嚴城吹角秋夜清風淒月肅隣
鷄鳴擊衣起舞欲拔劍無乃歲久青苔生
莫牙空老無人齒世人共寶鉛刀耳幕南
塞北行路難酬恩報怨竟誰是淪落沉埋

一削緱恥將彈鋏動諸侯豐城不掩干霄
氣越石何嗟繞指柔

對酒歌

宇宙自萬古人壽無百年我生之前漫無
紀我生之後殊杳然中間百年何太促始
覺人世徒堪憐况乃寰區受羈束曷能蓬
海求神仙幸有金昌醇耐美一斛不直三
千錢沽來快飲日不竭賴茲薄祿如流泉
清者可中聖濁者可中賢伯雅或在後季

雅或在前公榮不擇儕輩飲季倫欲就隣
家眠君不見花開枝上何娟娟春風吹落
隨寒煙又不見雲行空外百態妍須臾散
盡蒼旻天玉山常傾倒桑田任播遷曾臆
從教塊壘散形神自爾傀儡全一日可兼
十日飲百歲能當壽一千始信壺中有日
月不與人世同棄捐沉冥至理久自悟糟
丘爲我生青蓮

東覽篇

出門鮮徒侶看山過東越身披荷芰衣來
渡琅玕筏會稽之郡藏雲中海嶽靈區第
幾峯千巖萬壑望不盡一一秀出青芙蓉
溪流漱石瀆晴雪山水清音相映發林間
吹落蘭亭風松下飛來鏡湖月在暗花迷
失去津禽魚鳥獸能相親崢泓蕭瑟不可
測此中疑有箕山人蒼旻爲棟雲爲幕禹
穴幽奇可棲託絕壁噴吼嘯夜猿逍遙夢
見騎黃鶴清晨晞髮凌高臺風吹飛花去

復來旭日如珠走滄海赤霞爲駕驅天台
方丈蓬萊今可至居然便有凌雲思金宮
銀闕何必求一丘一壑隨吾志君不見東
山高卧支許從揮塵玄言若可終又不見
芳辰被禊臨清池茂林脩竹堪忘飢謝公
勉爲蒼生出十年間却登山屐右軍自失
王藍田歸來誓墓意惘然二賢信是人中
龍霖雨當時仰望同考槃一室已千載至
今林下生清風偶然得失未忘念令人却

羨雙冥鴻

春遊篇寄晉陵吳生

窮愁逼逼空嘆息遠游冠在猶堪拭伯通
橋下春水流布帆一幅千里遊芙蓉湖波
綠如染菴畫溪頭山幾點花明月白不知
夕髣髴扁舟重入剡舊遊曾識延陵生莫
逆窮交一步兵且作平原十日飲安事夷
齊千載名寂寞圖山老都尉遲我碧桃花
下醉錦江春煥浪俱香赤城霞流山失翠

金焦遙作兩青鳧水面飛來撲玉壺萬里
長江限南北令人長憶孫伯符燕子磯頭
燕子飛鳳凰臺畔柳依依看花偶入長干
寺策杖還須到翠微荷衣脫下白紛紛盡
是鍾山松上雲辟支洞口金光草梵率巖
中寶藏文攝山自古多靈藥歸來始踐微
君約悠然置我丘壑間高吟梁甫驚猿鶴
吾笑殷中軍廢後書空竟莫聞又嘆阮遙
集一生當著幾兩屐此身不帶封侯骨竭

來幸有煙霞癖黃金朱芾求不來白雲青
山隨可得不因未了向平緣五嶽追尋孰
我先知君亦是沉冥士寄此春遊汗漫篇

放歌行寄長安舊遊

碧桃落盡青春老黃金不鑄朱顏好男兒
策名須及時衰遲徒遣憂心擣少年投筆
欲邀勳西入長安謁聖君公車不獻長楊
賦都邑先傳喻蜀文朱門先達如疇昔留
驩得接夔龍席鳴環振珮聲鏘鏘瓊筵寶

幄樂未央暫同良夜醉鸚鵡期共清朝儀
鳳凰輝光草木俱生色假使白頭還可黑
意氣如山不願立談元可取功名借筋
畫成扶漢鼎箭頭書去破聊城居間然諾
良無負疆灌能勝一石酒藩車日赴孟公
期金錢夜作爰絲壽駿馬花驄白玉鞍濯
龍鳴鳳近金鑿英盼自堪回絳灌雄圖非
斬樓蘭得意能將知已酬此心未始羨
封侯一言不合拂衣去五陵遊俠還相許

鬪鷄走狗出長楸安能咄咄書空語自是
當時桓茂倫歷落落嶮崎可笑人今日低頭
在草莽放歌一曲于山春

觀舞篇

春宵曲宴通蘭房亭亭玉樹生夜光繡幕
遮風銀燭定紛紛妓樂俱成行中有燕姬
善楚舞當場可以掌中舉翩躚喜曳鮫人
綃柔弱纔勝翡翠羽應節依歌不自持疾
徐宛轉能擅奇明珠盤裡相錯落驚鴻天

外來參池徊翔素腕飛香雪虛空屢頓凌
波韞五尺芙蓉搖綠波一片輕雲蕩明月
顰容慢睇如有情步搖條脫斷續鳴公子
詞謠惟燕燕佳人名字只卿卿舞罷低回
整金鳳矜嬌顧影嫌釵重羞稱十五嫁王
昌登牆三載曾窺宋漫將長袖拂芳塵自
是行雲行雨身恍惚高唐夢中見敢云平
視甄夫人

聽曲篇

綠窗窈窕通明月朱絃奏罷何疏越燕姬
豔舞方具陳鄭女清歌相對發玲瓏宛轉
遶翠屏梁塵颯颯花冥冥師傅翻使驚協
律心妙直欲追秦青已聽泠然振林木復
聞餘響流空谷將無哀樂動人心蘇門之
笑秦庭哭當筵但見春融融無限玉樹搖
東風周郎欲顧曾無悞延年女弟徒稱工
新聲能令舊聲變貫珠不斷危如線偶覺
淒清拂黛蛾時爲掩抑看團扇畫棟輕雲
夜不飛鳳凰肯逐簫聲歸但憐白雪知音
少豈是紅粧絕代稀雲鬟零亂歌纔闋東
方欲明銀燭滅淳于一石自沉酣不使冠
纓座中絕

醉道士歌題弇山園藏卷

列真之宇太微宮碧桃千樹吹春風相逢
盡是餐霞客翩躚長揖壺中公壺中跳入
杳無際金臺銀闕非人世玉液涓涓滙作
池黃流泯泯傾如注式歌有酒旨且多三

三兩兩朱顏酖漫笑真人能服煉誰知老子亦婆娑髣髴步虛行復止曲肱聊隱烏皮几背痒欲倩麻姑搔覺來失却王喬履牛飲鯨呼總易醺牽裳濡首亂紛紛拍浮倒蹋瓊科案酪酏那開蓋級文土木形骸恒佇立手持玉笛吹不得平頭奴子力不禁扶攜踉蹌將安適浪遊五岳窮三山聯袂盡是桃花顏絳河迢遞誰相待上元夫人名阿環會時不問胡麻飯解醒五斗何足算牽出青牛欲倒騎黃冠歌斜白髮亂此中玄妙識者誰僊藥元從麴蘖遺披圖展卷心自醉頽然此輩真吾師主人謂若幸無負我且斟若以大斗儻盡當年醉步兵江東張翰應居首

婁水行訪曹子念作

湖頭暫借漁艇子春風吹過碧城趾具區初月挂吳山滄溟紫霓含婁水夜潮忽漲楊柳陂片帆却向桃花駛眠鷗宿鷺驚且

鳴棹歌不斷欸乃聲中流聞鷄曙星耿落
花飛出海上海上城停橈未入琅玕墅褰裳先
過曹丘生蕭齋兀爾枕書卧烏皮一几青
檀破問我經時胡不來袖中遮莫有七哀
大笑吾生太痴絕病腰猶爲五斗折屢蹶
霜蹄不知止儀也直欲亡其舌丈夫雄心
誰則知吁嗟有志無其時公榮未得即濡
首匡鼎相逢且解頤放歌一曲情無賴君
自芝蘭我蕭艾陳蕃有榻空梁懸解來徐
孺眠花前聊伴曹生日擊缶洋洋風雅銜
在口綿蠻不作吳儂言啞啞能驅小巫走
一斛珠璣錯落明儼然分惠盈五斗吾還
怪爾愛獨醒酒人只在弇山亭邇來不飲
真寂寞縱酒無愧天上星借來艇子且教
去平原十日須沉寔

謝都護歌

謝侯少歲學擊劔手綰飛虹腰掣電術精
乃去學兵法戰陣鉦鼓靡不合被命造舟

永嘉山長鯨道遇手自搏幾欲論功登將
壇落落不偶空據鞍閱世榮名何足齒問
巷沉浮聊爾耳短衣射虎姑蘇臺閉戶鑄
劍干將里買得桃花一疋駒騎來沽酒金
昌美世人失意汨汨憂羨君能自沾沾喜
爲嫌偏促城之舍新開別墅虎丘下窗中
亂撲青芙蓉竹樹蕭蕭遶臺榭俠遊酒伴
慣任船鬪鷄走狗都翩翩春草射麋秋放
鷗相逢欲賦子之旋座客恒蒲能擊鮮人
各取醉斗十千雖無銅山擅鑄權囊中不
乏子母錢吁嗟燕頷頭未白黃鬚森森尚
如戟江南秉鉞旬宣臣舊是永嘉來往人
即今推轂易爲力功名轉眼能自新勸君
努力報知己匣中毋遣神龍死君不見余
也十載傷羽毛身同鷓鴣困蓬蒿提攜拂
拭竟誰是哀鳴日夜徒嗻嗻於戲男兒四
十不能自附青雲豪尚爾坎硤骯髒沉下
僚贈君短歌還自嘲

短歌行贈王四丈瞻美

男兒何必紆朱紫但令布素恒如此又何
必侈金帛所貴人生在意適琅玕羣從鸞
與鳳上林太液紛翱翔第四偶然戀桑梓
羽毛楚楚口吻香白眉未嘗結青髻未遽
霜海燕雙棲遶梁語芙蓉一照蒲鏡芳千
金鷓鴣裘易解日醉鸚鵡杯難忘司馬纔
遺中人產對人無柰多青眼沙田種秫久
不登座客猶誇識信陵平生個儻無嚙齧

沾沾聊自喜任俠余生落魄數數奇十年
歸隱南山獵無端痛飲白玉漿有時脫贈
蓮花鈹每承然諾肝膽傾豈是論交在眉
睫躋彼弇山堂友于花萼尊俎光再過婁
水宅彩衣戲舞娛頭白人見頽然醉花月
不識人倫自爾能昭揭人見生平曳紈綺
不識窮交可以託妻子谷風再賦友道涼
吳儂情逐雲飛揚三秋門前正羅雀一卧
肘後生垂楊不有君來破岑寂翟公自署

徒慨慷眼中石交竟誰是酒酣擊筑天蒼
蒼

江風行與朱圖山泛樓船作

長江萬里吹天風將軍置酒樓船中樓舡
忽奏軍中樂無乃黯慘蛟龍覺山川出雲
歷亂飛疾來掩我白日暉中流洶湧俱辟
易人謂如此將無歸將軍自是湖海客神
氣自若催挂席浩蕩洪流欲挽回崩奔巨
浪能衝逆淵淵徐起回風搥長驅直指扶

桑涯蜃氣氤氳辨城闕鯨波蹴浪翻空花
分明棲息匡廬下碎瀑飛泉明月夜恍惚
窗牖峨眉端雪片紛紛六月寒湏臾暝色
垂垂黑前隊戈舡左右翼只尺蛟龍欲扣
舷夜光那向懷中匿壯圖寂寞何爲乎余
亦從君擊唾壺老驥能思千里不百萬猶
供一擲無人壽河清不可俟富貴不來行
樂耳世間多少弱男兒覓人顏色沾沾喜
曾憶長江牛渚邊温嶠焚犀夜放舡英雄

志業莫可測酒酣拔劍心茫然

塘上行逢友人顧願作

吳宮二月鶯啼亂金昌柳游子長安歸春
風吹鷓首鷓首重重桃李花楓橋塘上故
倡家綠水依然遶阡陌青樓忽聽彈琵琶
琵琶聲出垂楊裏李延年家高髻姊自言
有客深自藏落魄江東虎頭子拍浮濡首
酒池中胡爲染指阿房美平生痴絕將無
同我輩鍾情乃如此相逢不賦子之媒對

酒高唵嬌女篇興來不用常杯酌其奈囊
空無一錢君不見馬長卿臨邛一往有深
情又不見阮仲容鮮卑之婢累騎從嘗聞
古人貴達節區區禮豈爲我設少年行樂
須及時飛花轉眼紛如雪還惜昂藏一丈
夫憑陵嘯傲高陽徒麟閣榮名常在不首
陽餓死何爲乎

月下渡淮歌與馬孟李三都尉舟中
言懷

日落淮水黃月出淮水白水流向東南客
行自西北辭家見月兩回圓長路悠悠始
一千簿書期會如束濕卒史胥徒橫索錢
橐存無底空所有但見三星恒在罾身世
漂零只酒尊涼露淒蟬動高柳從事諸君
盡棄繻金堤赤岸爭先驅吁嗟百萬任狼
藉何事囊粟號侏儒吾生一飽了吾願坐
看鷓鴣飛不遠馬控龍媒自有人門藏金
穴曾無援久擬山中賦考槃胡然危壘巢
其端潦園傲吏日偃蹇竹林酣士多摧殘
夜深月照蘆洲寂樓船有檝何須擊最喜
黃頭善撻搗况邀白幘能吹笛淮陰黯慘
生悲風座中杯酌莫教空若過韓侯釣魚
渚便爲長跼酹英雄

遊吳山醉歌示越中同遊

吳人浪遊越越山舊名吳吳山窈窕如畫
圖夫容亂撲城之闌雲英不遠紫微省杏
花偏近黃公壚解衣貫酒獨感概還上高

臺聽鷓鴣鷓鴣不爲啼春雨似訴吳越興
亡語樂樂夫羞首已濡憂勤句踐膽能茹
偶爾憑陵一跳梁畢竟山丘共首鼠草上
同飛望帝魂宮中曾獻捧心女吳山越水
春融融吳王越霸歸東風白駒度隙促短
景朱花散綵成飄蓬乍來一笑已陳迹茲
山千古青無窮即今簫鼓錦城樂但識屏
翰皇圖雄吁嗟黃金不買綠酒醉胡乃憤
憤人世豈不聰

錢翁歌爲磬室山人壽

錢翁不是蓬蒿人自稱吳越諸王孫布衣
不受緇塵染混俗能將白眼存棲遲陋巷
蓬蒿翳抱膝長吟靡年歲家藏萬卷不知
貧更倚丹青曾絕世巴江急峽巫山峯漢
時古栢秦時松錢翁下筆無數點便覺煙
雲千萬重長康安道名誰稱世情都無神
自勝屨集常憎戶外塵蕭然一室如懸磬
錢翁不滿五尺長意氣能飛千仞霜等閒

不受諸侯幣虛左曾持公子觴吾家都護
弄柔翰風流寄興東山畔傷水新開燕子
樓臨花高捲鴛鴦幔愛惜長干劉采春當
時西第幾留賓坐中不少嚴夫子幕下常
多郭舍人自是錢翁交莫逆春山花月同
穿屐如今花落月西沉但見錢翁頭盡白
黃公壚下莫經過吹簫山陽感慨多凄涼
若問吳趨第四壁徒存一雀羅翟公門前
何所有春風乍上新楊柳百斛金昌綠玉
漿沽來且作錢翁壽錢翁七十意何如雲
在青天任卷舒他時儻盡通家子丘壑偏
宜謝幼輿

鄭客行寓清郡贈中伯文

仲尼老於行下惠援而止殊無懷土情鄭
客乃如此鄭客吾鄉老縫掖不根嫚戲無
推擇西遊落魄走邯鄲國有賢王虛左席
日留朱邱曳長裾貴幸何須駟馬車但慮
才高忌嚴忌誰言賦不如相如冠纓曾絕

感知已錦茵醉吐花靡靡無端壓倒玉堂
人只因撰出金樓子內家日給買文錢外
舍私為桃葉憐解將交甫明珠佩博得文
君綠綺絃秋風客散平原第齊東陋巷蓬
蒿翳不無岳牧致苞苴自有州司能擁篲
我來猶得稱通家相逢爛醉聽琵琶衛水
清霜照明月鷓鴣裘映夫容花自言僅免
窮愁逼無奈頭無一莖黑縱夢非熊入後
車不如安載歸鄉國

吳姬行爲四明沈嘉則買妾賦

吳姬二八顏如花翠帷珠箔藏虛家暫許
春風吹裙帶未容燕子窺窗紗粧臺纔掩
臨窗綉皓腕霜明映羅袖蛾眉效月一痕
新柳腰學舞三眠瘦瘦減腰肢似沈郎當
年未許嫁王昌不識紅粧堪換馬但知綠
綺可求凰遨游忘草郊居賦江城花縣啼
鶯路鷓裘時解茱萸灣畫舸偏經桃葉渡
吳閭新水泛雙鴛麗藻文漪錦浪翻毫端

幻出花千樹。賸得嬌枝解語言。含嬌含態
情難說。爲雨爲雲。夢無歇。巫山峽。遶曹娥
江。襄王臺在。禹王穴。采蓮越女。濕綃衣短
棹穿花過。釣磯瞥見吳姬。不相識。恍疑洛
水神。僊歸約。開蓮葉。隔花語。爲問館娃宮
幾許。依依楊柳。苧蘿村。此是西家捧心處。
錯落明珠吐鳳釵。陸離端錦合。懽裁昔時
越豔歸吳去。今日吳姬入越來。甬東山水
蓬萊島。朱顏綠鬢同偕老。風流願比賀季

真鏡湖春色年年好

蘇生行

蘇生縱橫客。寂寞休明世。尺寸無所成。坐
嘆流光逝。少歲曾爲南粵遊。尉佗椎結最
難柔。軍前長揖無數語。遂今面縛聞戈矛。
歸來牛酒相慰勞。上功幕府寢不報。翻然
結客少年場。五陵豪傑親除掃。解裝猶剩
千黃金。徧置鴛衾與鳳簪。好將陸賈平生
橐。結得徐娘既老心。春明門外花如綺。羽

林緹騎侏侏子相逢太快共樗蒲絕叫狂
呼盧與雉百萬常輸囊屢捐妻然擊筑夜
無眠慶卿遠去漸離老孤劒寒風易水邊
東歸骯髒身何寄數椽如綫隣蕭寺短衣
彈雀逐群兒長鑱采藥遺仙吏看君體骨
良不恒面如紫石何稜稜誰言山澤常如
此忽有風雲或可乘男兒七尺須奇節黑
貂何必愁鶉結陰符一匣在床頭莫使靈
文久磨滅

短歌與一二僚佐登城樓作

吳鈞繡澁不能鳴匣中隱隱青苔生高天
九月霜華白草木黃落夫差城夫差城中
誰作苦摧眉折腰在行伍父書徒讀亦何
爲投筆十年無比數藏活曾棲廣柳車沉
酣屢謫西曹簿男兒骯髒安足嘆世上紛
紛鼠變虎衛青亦是主家奴須臾功成享
茅土出無知己仕無媒不如將身隱屠沽
丈夫空自羨雄飛今日登臨對落暉滿目

山川非異國仲宣何事淚沾衣

謝都護游山歌

謝家雅有東山興
謁來許我才情勝少年
有事戈與漁垂老無心負
且乘春風滿地吹
接羅青山綠酒堪忘飢
雙艇移來疾於騎
五湖便是高陽池
林中排調日酣暢
三春共蠟屐幾兩自是狂
奴去復來至今痴
叔猶無恙吳王臺館久
棘荆山丘尚被吳王名
雲興雨散竟何託
雄飛雌伏徒營營
君能於此了無累
黃公壚下頽然醉
邈來喜怒誰得知
褰帷且問如花妓

燕京夜雪篇

北風吹沙日無光
北門寂歷鳴枯桑
須臾暮雪飛
陋巷蓬扉不開卧
欲僵西隣客子忽排闥
蒼頭寒步持壺觴
恍如層冰甫挾續又似幽谷回
春陽何暇秦箏與齊縷
不去彈碁共格五
卿語綿蠻自少文
行酒崢嶸能用武
因憶邊城雪作山
崎嶇萬里玉

門關水連瀚海懸軍入凍斷交河探騎還
以身許國寧憚死安顧裂膚仍墮指今夜
相逢杯酒間何如此輩沙場裡
行行且游獵丁丑九月作

少歲從軍出武威兜鍪日耀生光輝沙場
大小七十戰數奇歸拚南山扉南山近有
白額虎會須煩我大黃弩朝來結束過藍
田馬如游龍轡如組入林黯慘路不平披
開荆枳飛鳥驚亂石崔嵬壘如屋咆哮萬
壑陰風生顧盼憑陵了無覺應弦即倒何
須搏易兒本意重生擒飛而食肉良不惡
甲賣弓藏一十年偶因射獵淚潸然捫虱
若談當世務白額豈在南山前頭足於今
變冠履取民脂膏充簞簋假彼繡斧得橫
行縛取貪殘猛虎獻
天子

隱者詞焦山寄客

伯成耦耕耕且鋤務光避世世情無古來

隱者不以帝王易何況區區趙孟三公乎
山人頽唐隱者姿蕭蕭蕭蕭孤松枝紫芝
黃鶴久不作清風朗月恒相思相思不可
見遠隔江之湄不寄投湘賦唯吟招隱詩
碧桃開徧綠水洲山人猶在人間游富春
磯閒海鷗下鹿門山空猿鶴愁諸侯筐篚
不足貴天子安車何必求但須寂寂山之
丘明月爲侶雲爲儔庶幾不愧乎隱者流

山人勸酒

灼灼桃花濯濯楊柳溪山窈窕溪水流武
陵人家猶在不柴門不閉春風輕山人衣
上春雲厚相逢莫使青松疑世間盡用黃
金壽原嘗春陵千載人嵇阮山劉一杯酒
賤亦不足凌貴亦不足憑雪山有時燠溫
泉或可冰高岸爲谷深谷爲陵詩人豈欺
我倚伏多相仍山人勸我酒旨酒清如澠
漢家功業在天上吹簫屠狗之輩坎珂歷
落來攀登

還山吟

還山吟桂花松子秋雲深山人還山抱孤
琴空山猿鶴來相尋披裘何必登遙岑遠
公自有東西林東西山色看皆美一入林
中可以止土木形骸無所擬悠悠忽忽恒
如此再歌還山吟朱顏俄受白髮侵還山
欲俟買山金無金終負還山心一瓢一錫
且隨意許由巢父百世之上爲知音

柳花歌金陵送客

吳宮濯濯春楊柳東風吹花滿渡口搖煙
拂水總無關綴雪沾霜竟何有滄浪漫使
寒人衣武陵亂約桃花歸自是青春留不
住非因黃鳥蹴能飛芳草晴絲引江渚飄
揚千里同君去遠游誰遣遲蕭郎風流展
轉思張緒建業青山繞大堤女郎團扇撲
高低往來不見臨春閣且入長干送馬啼

胡笳歌送客出塞

送君交河湄兩岸胡笳悲胡人自愛胡笳

吹楚客聞之雙淚垂白沙飄揚白日晦黃
雲黯慘黃狐塞一曲驚飛碣石鴻再吹淒
斷天山風胡笳歌不長胡笳聲自壯羽書
亟備邊烽火催乘障胡騎清宵俱北征滿
地胡笳對月明他時獻凱功成後翻使軍
中奏此聲

草閣謠戊寅夏志感

子雲草閣無數椽風雨不蔽何蕭然常抱
明月巢其端歸鴻鳴鳳同翩躚何物黃狐
爨下遊雄飛雌伏將焉求狡焉日欲穿我
屋胡不爾思正舊丘長謠送爾歸吾自拚
吾扉庭梧日徙倚山桂生芳菲

黃河客舍歌

杖策度河來止舍河堤下衰柳當其門荒
齋生在瓦中有少婦能具餐舊襦掩肝餘
雙鴛坐剉草飼我櫪上馬牽藤挂我腰下鞅
客舍金錢真自惜那堪一粲壚頭言

伐檀齋集卷之三終

伐檀齋集卷之四

吳趨張元凱左虞著

七言古詩

憶舊游二篇有序

丙辰歲不肖甫弱冠先昭毅携之薄宦

鄭中鄭楚地連秦蜀山谷崔嵬幕閩岑
寂不耐操觚頗事俠游與二三年少擊
鮮射飛斗酒慰勞煦煦樂也戊午歲昭
毅量移閩海海正揚波戈船下瀨羽檄

紛紜歷三時而始戢閩多佳山水珍草木
得以徧遊恣采惟日不及庚申歲昭
毅乃抱采薪而解閩矣歸甫七年不幸
捐館重以子之落魄無成不堪日夕憂
也不肖尚能履后土而戴皇天哉有覲
不歿荏苒十年冥頑如瞽載蹈奇禍鬢
毛半秃肝膽盡灰假使昭毅生存何忍
見之捫心酸鼻所謂泣盡而繼之以血
者也爰動悽吟爲憶舊遊二篇頗侈少

壯之遨遊益增老大之忉怛云爾時丙
子九月十三日

憶鄭中舊游

憶昔少年落魄何少文豔說漢家棄繻之
終軍長鋏明秋水高冠切流雲懶向惟中
學經術慷慨塞外邀奇勳吾家嚴君秉雙
鉞鄭中分閩專征伐結束何須走燕趙蓮
花幕下藏明月草檄青藜徹夜然呼鷹紫
燕臨春發屢捧侯羸觴願結王生鞞

耆舊多英風隆中曾聞起臥龍
樊口荆門連蜀道方城漢水通
秦封單車匹馬日馳驚布衣遊俠私相雄
輝煌境內山名武泰時甘泉不足數
金銀宮闕帝子居菁葱洞壑神僊府逍遙不采真
汗漫時射虎飄零夜雪披鷓鴣孟浪春風醉鸚鵡
大堤連袂回朱輪綠楊紅杏枝頭新
擣蒲擲得雙鸞錦剪裁覆被如花人迷花醉月經幾載還道青雲期尚在功名莫遣負山河意氣須

今傾海岱舊遊如夢總堪憐
雨散星離二十年數奇且作藍田臥人棄唯耽草閣玄
行樂難再遇往事已惘然
短歌悽斷夜不眠恍如牀頭易水鳴濺濺使我不覺有淚如流泉

憶閩中舊遊

憶昔海波乍飛揚長鯨吐霧白日黃
家君作鎮閩之疆手提三尺擒其王
幕中盡舉萬年觴饒歌凱曲何鏗鏘
從軍未許稱王

粲草檄無煩借孔璋曰余小子不好武當
筵漫學賦鸚鵡細柳營前羽戟閒芙蓉幔
裏娥眉嫵玉勒驕嘶踏落花銀箏緩調鳴
朱戶枚臯詼笑類俳優束皙嫚戲能消愁
鬪鷄蹙鞠沉里巷射麋且兔空山丘喜爲
豪士岸白幘曾見胞人傳綠鞵貴遊造請
刺磨滅博徒之輩聊延結大道相逢脫佩
鈎交驩豈必歸金埒青州從事玉液香紅
綃荔子冰肌潔壚頭且醉鄭櫻桃一曲新

聲夜月高懷中自有明珠賣座客何須綠
綺挑少年行樂常如此寧知花謝秋風起
拂衣長揖武夷君扁舟直指吳江水歸來
寂寞夫差城年華屢傷五柳更蓼莪再讀
涕泗盈於今白髮有幾莖懷讒抱譖日不
平我思舊遊歌且行匣中夜夜雙龍鳴猶
堪報國圖崢嶸

春日遊金陵牛首山寺漫擬龍門應
制之作

萬柳暗馳道飛花度官闕匹馬碧城隈曉
向長于發長干髣髴漢長楊玉露金莖滿
路香仙人高觀分鳩鵲帝子靈臺集鳳凰
別有雙峰霄漢外空翠飛來撲衣帶鳥道
孤懸出梵林松濤十里藏天籟層巖嘉樹
鬱菁葱疊嶂流霞一萬重琳宮嵌入雲中
壁繡閣徊翔木末峯丹青丘壑圖難盡綺
錯山川望不窮瑞氣祥光藹畿甸周京漢
苑氤氳見鳴鳳樓臺散若星鑿龍池水澄
如練鷲嶺朱幡俯太清鴈堂紺宇千花盈
明月玲瓏菡萏塔青山窈窕芙蓉城明月
青山恒若此金僊繡佛同終始龍藏岩堯
七寶臺麒麟鸚鵡獻花來纖埃除掃空門
淨大明照耀中天開霓旌披拂雲旗展萬
乘輝煌曾駐輦金陵定鼎卜千年虎踞龍
蟠此後先五嶽區中誰王氣三山海底孰
神僊祗遏北平戎似雨故遺白下草如煙
明時未效卷阿頌在野聊成擘勝篇

京口桃李園作時戊寅春趙敬甫鄔
汝翼陳永年同遊

三月弭帆京口渡大堤十里垂楊護故人
行樂桃李園恰有花開一萬樹爛熳常生
五色霞氤氳散作晴空霧赤城忽擁錦江
流朱方即是瓊臺路遊子來回總是迷佳
人采摘還相妬拾翠尋芳樂未休相逢且
作少年遊鬪鷄走狗花前隊穠李天桃樹
底謳莫將螻首疑閨孺更傍蛾眉認莫愁

團扇撲時粉蝶亂舳舻飛處紅英浮沉酣
聊且眠金谷潦倒那堪控紫騮但恐芳菲
易銷歇長江寂寂流明月黃金縱有南山
高難買春花秋更發片片飛花踏作泥陰
陰桃李自成蹊開時不盡一杯酒孤負枝
頭黃鳥啼

申太史招飲邸第席上漫呈

八月涼秋動城闕朔方候鴈催羣發防秋
羽騎夜授衣破虜將軍朝秉鉞無能輦下

請長纓投筆書生志未成黑貂久作長安
客青眼誰深故苑情玉堂學士伊周侶退
朝爲我設鷄黍相對惟多桑梓言不作金
華殿中語幸覩熙朝日月新欣逢河嶽又
生申掃門豈是通私謁推轂偏能問故人
慚余射不能穿扎束髮空教慕奇節歸臥
南山一十春馬無羈勒車無轄我輩何須
尺寸功但令公等致時雍願言王者稱無
外肅慎呼韓作附庸

春日宴弇山園呈琅琊長公

長公天下士子房安石差相似弇園美無
伍方丈蓬萊堪比數朱簾翬閣白雲中蒼
峽魚梁綠水通高張雲錦耀日月披拂玉
樹吹春風巖藏洞復忽欲暝花撲飛泉路
不定蕭瑟崢泓不可言長吟清嘯蛟龍聽
一望煙霞草木深且耽丘壑不爲霖玄亭
寂寂無絲竹自有泠然山水音春宵花月
歡爲劇入林酣暢仍浮白相看盡是飲中

僊何必平泉醒酒石慚余落魄久懸鶉自
是嗽崎可笑人葛彊頭白無推擇常伴清
遊山季倫終使椰榆滿人口青蠅白壁亦
何有不能廢我嘯與歌熟讀離騷痛飲酒
古來出處隨乎時赤松之遊良可師雖然
得意東山臥無奈蒼生有所思丈夫磊砢
無多慨要使身名俱受泰弇園歲月一杯
中長公心事冥鴻外

承左虞兄過訪贈余長歌感激用壯

聊爾志荅

王世貞

張侯若乳虎少負食牛氣生平所不平
舍兒比國士懶爲大將長揖人何況州
司折腰吏腰間累累金符黃再懸再擲
還君王桃葉渡頭解兔鶻柳花店中脫
鷓鴣寧容醉尉呵止宿甘與侏儒共一
囊雖然落魄高陽里畢竟難呼紈袴子
當憶明月將報恩入匣清霜少知己以
茲宿草荒蔣徑時復扁舟下婁水興來

贈我長歌行伯氏復與施丹青恍如輞
川入我案又似易水濺濺鳴虹雲繚繞
氣鬱淳珠璣錯落光縱橫丈夫有才終
有用爲汝感慨神俱竦生欲槌周子南
牀死欲掘顧元公冢嗣宗見忌雙眼色
宣明可憎一面孔汝莫學灌將軍我非
竇家老秃翁偶然小醉漏消息前身自
是汝南公但遇人間失意事相將跳入
玉壺中

飲大司成姜公園池席上敬呈

姜公言行爲世軌好似東京李元禮升堂
便比登龍門暫與同舟以仙擬一出曾爲
帝者師門如市兮心如水平嗟古道入莫
容意色蕭然可以止爲園築室江之干移
得青山滿綠湍五株初種彭澤柳九畹先
滋湘水蘭披襟坐對秋月朗更看寶樹明
虛幌碧池隱有鳳凰毛青雲已着鷓鴣想
草木禽魚亦有文石渠金馬夢氤氳常搖

白羽團如月不着朱衣爛若雲考槃在澗
聊暫寄矢志心欲攬清時轡何來海內忘年
交孔公座上禰生醉知君自是名教人桀
溺何須笑問津汲黯尚爲前日戇馬卿猶
是舊時貧蒼生欲奪丘園志白髮能強負
荷身相逢不盡漂零嘆對我常將青眼顰
吳興潘中丞上蔡張參伯小集草堂
漫成長句
杏花開滿夫差城城頭初月纖纖明春風

幸不棄巖穴蓬蒿亦自來簪纓謝公暫着
東山屐步兵本是江東客一斛葡萄鬢未
星千里尊羹盃浮碧蕭蕭瑟瑟無歌鐘清
音忽起庭下松楚雲生棟帷苗苜吳山供
客餐芙蓉白駒空谷誰繼響鳴鶴九臯聲
朗朗風標不似世中人霞舉猶爲天際想
知君自是夔龍賓何事江湖欲問津爲霖
爲雨若有待一丘一壑非其倫愧我青袍
久零落草堂燈火同驩謔別去依然三徑

荒不堪置兔堪羅雀

春日住堯峯山寺示瑞上人

誰謂東南山不高堯峰之嶺何岩堯等閒
鶴雀飛不過無數蛇龍臥自驕冥冥蒼靄
雲樹亂風雷常走山之半黯慘巖扉晝不
開欹斜石磴危疑斷憑凌眺矚鬱嵯峨一
起一伏山如波透迤盡逐五湖去琉璃盃
內盛青螺振衣千仞寂不語喞然長嘯應
孤嶼黃鶴仙人招不來扁舟范蠡從茲去

落落乾坤何不容吳水吳山幾萬重此身
不啻如一蟻安能跼蹐悲途窮頭顱猶黑
舌猶在猶堪一日三千鐘生兒寧盡如孫
仲馬上何須羨迺公英雄事業流水盡五
陵荒草秋風緊世界浮生大夢中空華倏
忽看朝槿遠公近借青蓮室猿猱麋鹿同
招隱閉門滿地白雲流風吹松花墮金粉
聞助甫叅伯近有西秦之命喜而賦
詩寄之

海岱煙雲開仰見日月朗頗有高世心悠
然發遠想明珠成霓玉成虹不見蕭敷與
艾叢乍聞初拜涼州牧乃是河南張長公
向來不與人間事消息傳來喜不寐屹然
獨立有長城何必秦關重百二丈夫高抱
樂長征瀚海天山渺去旌祁連大漠風雷
色踈勒飛泉金石聲坐鎮清風生朔野三
軍盡愛寬裘者自是中朝山巨源一麾出
守看平蕃檄書不借陳琳草遊俠母煩劇

孟言獨據胡牀圍細柳竭來殊勝東山不
黃石相逢知我心蒼生有待何能負昔時
邂逅婁水邊琅玕甲第青雲連讀君新詩
如入峽絕壁騰波天倒懸我馬玄黃飢且
饑何期一見稱神駿價覓千金市與人主
非伯樂誰能信由是蹉跎一十春蕭蕭雙
鬢半如銀君今新得酒泉郡應念東吳舊
酒人

喬觀察允德歲暮過訪草堂連榻旬

日漫成長句爲別

西風卷黃葉堆壓門之屏霜薄身上衣冰
厚爨下井偶有足音響空谷枯桑驚散飢
鳥影君爲岳牧久專城朱衣爛熳黃金橫
何事蕭然却車騎獨披鶴氅尋柴荆逍遙
不減漆園吏慰藉偏存甕牖生幸有新醅
共君醕尚留木榻同爰處欲說荒齋如此
寒偶被風吹不能語陳家糠覈聊自肥范
叔綈袍竟誰與疇昔轉輸駕樓船兩年在

君繡斧前汗血願爲伯樂用心膽欲向干
將懸不遣青蠅將玉毀無奈蕙苾如珠圓
一歌雀角穿我屋再歌黃鳥食我粟淮市
曾爲胯下行灞陵屢止亭中宿莫將時命
強干秦吁嗟道路難於蜀羨君官爵良不
卑經綸獻納努力爲握手何當國士遇拊
髀誰動明王思酒酣別去淚如雨生平敢
負喬公知

弇山園逢沈嘉則席上見贈漫賦長

句爲荅用紀茲會之盛

西園彙才彥主人陳思王式燕芙蓉池言
解翡翠裳坐臨秋水弄皎月澄觴飛蓋生
明光遂令花萼寄緗素髣髴簫管遺琳琅
後來盛事誰則同弇園開在婁水東賓主
曹劉日方駕羽翼風雅何冲融何來四明
有狂客亦與七子相爭雄蕭然入林共把
臂便覺松下生清風杯酒相逢即定交袖
中投我以瓊瑤漫試千言在倚馬獨工五

字能射鵬山雲恍披鷲鷯錦池水忽漲桃
花潮座有玉山多自歎況復錯落飛金卮
高柯驚動靈鵲起長川澹蕩天河移後人
豔說今日會却如今視西園時

橫塘逢錢功甫同泛湖上功甫作歌
爲贈率爾爾之

橫塘十里青山轉太湖秋水明如練菱歌
纔起眠鷗驚蘋花盡落遊魚見蘭葉浮來
五兩輕葡萄一斛偏能盈縮項艇頭銀片

閣巨螯盤裏珊瑚橫船窓亂撲芙蓉綠鷗
鷁杓泛清於玉一歌杜甫漢陂行再歌李
白烏棲曲臨流擊楫煙雲開欲傾李杜平
生懷相逢齷齪莫可語眼中唯見錢生來
錢生謂我才情麗鷓鴣裘上春霞曳胡爲
執戟風塵中折腰十載青衫敝子言疊疊
真慨慷丈夫無淚沾衣裳湖波萬頃峰七
十與子携手同翱翔楞伽精舍翠微裏松
篁遶屋花盈几支郎却喜許詢至旋開香

積醞醜美夕陽明滅水上飛千山盡紫光
濕衣空門曠寂且高臥城郭偪促毋庸歸
君不見初月一痕五湖渺館娃鏡裏蛾眉
巧又不見吳山落木秋風急越來溪上戈
船入僭王圖霸倏一時故宮荒寢千年思
黍離麋鹿宛然在夫差勾踐爭何爲子懷
和璧徒美好我非石人不耐老歌鳳狂言
祗自嗤雕蟲小技安足道但須日飲三千
鐘頽然醉倒萬事空醒來孤嶺發長嘯一

聲驚落高天鴻

長歌贈左虞世丈

錢允治

將軍干城自赳赳豈徒宜免稱馬走人
看燕頷復鳶肩不識錦心仍繡口曾懸
金印耀兜鍪樓船笳鼓淮之洲秋風萋
菲生道路拂衣歸獵南山頭南山歸獵
不得意青鬃朱顏那可遲但須肆志美
遨遊肯令高抱空憔悴醇醪八斗醉不
醒向人白眼無復青有時揮毫吐曾臆

倒踏秦華翻滄溟散爲雲霞結爲綺狂
呼老杜醉呼李誰言匡鼎能說詩一時
儕輩莫可儼琅琊中丞人中龍推轂唯
稱張長公弇山似是習池上葛彊日日
陪山翁歸來煙月五湖冷獨往翩然如
泛梗幾向山僧乞石牀時逐飛雲度前
嶺憶昨值我橫塘西相將携手尋招提
深林趺坐花疑雨青天揮盞醉如泥坐
擁沙彌不知返醉語咕嚕日漸晚扁舟

蕩漾菰蒲深仰天大叫髮媿媿曾中壘
塊澆仍多土木形骸奈爾何若今借與
桃花馬定墮城邊綠玉波與君通家非
一世與君結交在綺歲年來詞賦窮而
工風期汗漫遙相勵余亦窮途失意人
讀書三十未成名縱君坎坷無遭遇豈
似吾徒終歲貧

陽山顧生願甫贈我長歌頗過推與
乃述懷志荅

男兒七尺期自愛要令姓字千秋在不然
草木與同腐富貴紛華何足數吾家驃騎
從

文皇賞延帶礪山河長誰知後世賤介胄
蟲沙猿鶴無低昂吾生久拚棄五斗無奈
磬磬啼入口身沾寸祿爲人役手持破斧
門挂席逐隊隨行公府間緇塵赤汗難爲
顏借人瘦馬風吹倒傳家舊蒂屋漏殷首
如飛蓬色如土傷人猶妬蛾眉嫵以茲貝

錦耀空幻屏居寂寂南山澗陰符在匣羞
與傳父書賸有毛萇編皎月流暉照白雪
飛泉疏越鳴朱絃雖然踉蹌人間棄但言
風雅心如醉乍來破產聊自放青山嘯傲
常無恙江東復生顧虎頭自云痴絕無所
求徙倚滄浪賡孺子拍浮綠酒歌張侯貧
交廿載真爾汝何事長歌太稱許謂我斯
名堪不朽敝帚千金良可醜吁嗟髮短心
則長敦詩悅禮聊自藏攀援今人身徒瘁

尚論古人口亦香君不見楊家子雲老執
戟至今玄草光生白又不見湘纍沉浮在
魚腹世間離騷比珠玉母論鴟士與波臣
日月文章萬古新卽今青鬢不努力展轉
白髮來侵人

張侯行贈左虞都尉

顧願

吾觀今古兜鍪士銀鞍繡轂沾沾喜學
書纔足識姓名矢志唯堪取金紫登樓
清嘯久莫聞橫槊題詩竟誰是迺公馬

上嫚詩書胄子人間豔紈綺今之都尉
古徹侯張侯事業非等儔鄴架從知蠹
魚樂董帷常抱書生憂詞賦儼然挾西
漢風雅直欲追東周雀弁胡纓塵一尺
綠沉金鎖閒三秋偶然肘後黃金耀胡
爲又轉樓船漕豐草長林麋鹿心金羈
玉勒非其好視之敝屣且擲還偏促不
耐蓬蒿間木蘭一葉浮綠水醪醪十斛
尋青山余家住近青山下落魄無心問

耕稼奚啻平原十日留高陽徒侶無冬
夏邇來散盡牀頭金朱顏恐受白髮侵
丈夫有懷自激烈何嗟獨未逢知音君
不見萬鐘世祿倉廩積牙籌會計靡遺
策瓊軒綺構入青雲北印好占山盈尺
又不見介胄功高享茅土分符秉鉞氣
食虎一朝失意歸窮巷夜行小尉乘醉
侮何如張侯富貴輕獨抱明月凌滄瀛
有曲真堪和郢雪無字不可償連城雕

蟲寧耻壯夫事附驥敢羨昇天行一時
不顯張侯跡千秋不朽張侯名

寄宿田家偶述

西原夕照生平陸東臯陰陰返樵牧夜行
恐有醉尉呵驅車且入田家宿田家老翁
開柴門擁彗不解犢鼻褌青山偏近新茅
屋綠酒那嫌舊瓦盆爨下一婦亦華髮豆
萁亂束烹枯鱖團團野坐不燃藜短簷之
下多明月自言門戶無壯丁數畝山田久

不登近歲徵科猛於虎幾年蓄積消如水
閨中有女年十四求鬻豪家氣勞頓蛾眉
換得金錢歸掌中空有明珠淚不記豪家
誰姓名此兒歌舞便教成婉媚自能當主
愛光華漫許傾人城前年寄采宜男草曾
遣蒼頭向吾道此中梁肉厭丘坻忍令葵
藿常不飽雖然兒女情自偏不如聊且耕
吾田以色事人豈常好人間富貴浮雲然
聞之長嘯斟大斗仰見明河落高柳相逢

良夜一論心別去清溪重回首

送蔣邦士守備江藩

君不見淮陰侯絳灌爲伍恒自羞又不見
灌將軍武安怠驚若罔聞男兒七尺不易
生要令千載知其名吾今困處蓬蒿室寸
心炯炯無人識東鄰少年何瑣尾西家老
子生兒齒潦倒生平那可論區區唯有蔣
侯耳蔣侯能誦孫吳篇援臂善開五石弦
從來未肯畏強禦片言可以服文吏畢竟

二千石不攬衛尉權能作吳軍氣終今趙
璧全遂爾聲名滿人口量移遠駐江之右
江頭送別試雕弓楊葉穿來當折柳西風
吹落滿地霜晨驅匹馬上河梁寶刀脫贈
泣數行英雄事業誰能當壯心寂寞何爲
乎送君慷慨歌烏烏

送謝芝玉轉餉北上

謝侯年來半白頭胡爲又作燕京遊張生
久乏資身策厭向人間送行客冰滿關河

雪滿山持觴欲飲風吹寒貂裘攬挈慘無
語嘆息離人行路難年光寂寂流如電愈
見江河成世變君在行間三十年由來吾
輩人人賤丈夫所志在雄飛安能雌伏情
依依周王大發鉅橋粟伯夷甘守空山薇
人各自有志士也難再辱縱謂時乎肯復
來安能長受人羈束南山之趾北山頭白
雲片片還相留卽看明世無真隱何事秦
時有故侯願君不負青山約且執牙籌算
行橐黃金留作買山資莫向長安乞官爵
吾先躡屩深山中君歸定訪山人蹤看君
白髮增幾許撫掌大笑滄溟空

堯峯山清暉軒落成送楞伽寺弘上人歸隱且見余志

堯峰古刹連翠微黃茅葢殿白板扉鳥窠
蟒窟僧住少祗餘山水含清暉楞伽山中
大弟子偶來飛錫披荆枳石頭路滑雪紛
紛却遇龐家老居士相期巖下種青蓮懶

乞人間造業錢無金布地不着想有珠繫
衣且自捐一袈裟地無十笏綿蕞草構爲
禪室松塵蒲團日日閒黃花翠竹纖纖出
本來無住亦無生究竟何能識淨因且將
清澈寶雲井作供燈光華鬢身澗底流泉
鳴不止峯頭朗月恒如此蝴蝶浮生夢已
醒蓮花事業心如水般若慈航只尺間菩
提高樹豈難攀願留白足常爲伴未許黃
梅便出山

辱張侯詩女句送歸清暉軒小隱勉
爾奉寫頗深勸駕
僧真弘

張侯久發空門心肘後擲去纍纍金自
是人間不得意却來方外尋知音常住
楞伽山一塢不遠城郭猶塵土望見堯
峰霄漢間紫芝黃鶴誰爲伍同蠟登山
屐兩雙重開絕壁雲中窓宰官不現當
年相居士從知舊姓龐負米捐金良不
惜剪拂孤松挂孤錫巔岼鑿構無數椽

丹青薜荔空山寂孔雀函前照慧燈寶
雲泉水清如冰出世住世俱稱佛無髮
有髮同爲僧支郎室裏天花積虛席淹
留謝安石遠公開社白蓮上醍醐獨設
陶元亮張侯知識非常人建得功名誰
是真不如精進山中業或能一悟超千
春

客舍荅顧願甫

燕京八月青霄飛秦庭客子悲無衣千里

故人一書札附戎式微胡不歸馳驅失路
汗無血縱橫計盡徒存舌三秋雨散金錯
囊十年苔繡芙蓉鐵但願鍛羽歸故山將
雛栖息藩籬間仰看吾國有大鳥飛鳴有
意驚人寰

初春與客卽事

霏微細雨生湖濱門前柳色朝朝新芳草
能留遠游客黃鸝似報江南春杏子花開
好顏色施朱着粉誰爲飾嫣然疑是東家

姝乍來窺我墻頭立似與東風舊有情相
逢沽酒闔閭城婆娑且就壚頭醉慷慨誰
論世上名

喜謝侯相過

夫差城中車與馬揚揚誰識衡門下安石
能來問許詢相逢絕少元規塵直鈎共把
滄浪釣開口且向青天嘯東鄰杏花方媽
然柳條纔可勝春煙牀頭祿米儲一斛換
酒堪直三千錢

寒食限韻作

闔閭風土不禁火綠水城邊碧油舸屢逢
蹴踘踏花茵時見鞦韆亂雲朶金蓮點點
步底生鴛鴦彩彩纏頭躡越女曾爲吳館
娃周郎只合留江左前溪桃樹隔垂楊髮
髯紅妝隱青瑣

楓橋與送者別

楓橋秋水綠無涯楓葉滿樹紅於花萬里
之行纔十里闔閭城頭尚堪指遊子尊前

淚濕衣離心已逐片帆飛酒酣不識身為
客意欲元同送者歸

揚州春眺卽事

紫萸村邊楊子灣黃公壚頭使者關舟楫
遠通淮北水樓臺近見江南山高岡百尺
臨官渡浮煙不盡斜陽暮前朝楊柳幾株
存寒鴉飛盡蕪城路

客堂秋夕

高梧百尺入雲涼清水一池生月光秋夜

初長客不寐坐聽砧聲思故鄉明河展轉
天欲曙寒螿唧唧猶自語挈衣起寫故鄉
書明日關河鴈南去

新豐主人

新豐主人邯鄲婦依然賣酒三河口芬芳
芍藥氣如蘭澹灑葡萄綠於柳東風日日
飛輕塵遊子年年只問津遲迴立馬門前
客曾是壚頭醉臥人

伐檀齋集卷之

終

